

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN MANIVANAN A/L GOWINDASAMY
(KAPAR)**

PERTANYAAN : LISAN

TARIKH : 19.05.2016

Y.B. TUAN MANIVANAN A/L GOWINDASAMY [KAPAR] minta
MENTERI KEWANGAN menyatakan :-

- a. apakah langkah-langkah dan strategi Kerajaan Persekutuan untuk membanteras dan membendung jualan arak murahan yang semakin berleluasa. Senaraikan statistik secara terperinci penangkapan berkaitan jualan arak murahan untuk tahun 2013, 2014 dan 2015 dan apakah tindakan-tindakan yang telah diambil oleh Kerajaan Persekutuan terhadap penangkapan tersebut; dan
- b. apakah Kerajaan Persekutuan berhasrat dan bercadang untuk memperbaiki, memperhalusi dan memperketatkan undang-undang berkaitan jualan arak di Malaysia.

JAWAPAN

JAWAPAN

Untuk makluman Ahli Yang Berhormat, Kerajaan sentiasa memantau penjualan arak murah yang memudharatkan kesihatan dan mengakibatkan gejala sosial dalam masyarakat dengan menumpukan kepada aspek tahap kandungan alkohol dan akses kepada pengguna yang sentiasa dikawal dengan rapi. Menyedari impak negatif akibat penggunaan arak murah, Kerajaan secara berterusan sentiasa menitikberatkan tindakan penguatkuasaan dan memperhalusi, memperketatkan serta menambahbaik undang-undang berkaitan jualan arak, terutamanya arak murah.

Antara inisiatif yang telah diambil sebagai usaha untuk membendung pengeluaran, penjualan dan penggunaan produk tersebut adalah:

- i. Membekukan pengeluaran lesen di bawah Seksyen 20 Akta Eksais 1976 sejak tahun 2006 supaya tiada peningkatan bilangan pengilang minuman keras dalam negara. Pengilangan arak secara haram (tanpa lesen) boleh diambil tindakan oleh Jabatan Kastam Diraja Malaysia (JKDM) di bawah Akta yang sama.
- ii. Menetapkan syarat kepada standard pelabelan dan pembungkusan arak, larangan penjualan kepada mana-mana orang yang di bawah umur 18 tahun dan juga larangan

mempamerkan bagi jualan apa-apa minuman beralkohol bersama dengan makanan lain seperti yang diperuntukkan di bawah Peraturan-Peraturan Makanan 1985, Akta Makanan 1983.

- iii. Kawalan aktiviti penjualan dan pengedaran minuman keras melalui pengeluaran lesen oleh Lembaga Pelesen bagi setiap kawasan Pihak Berkuasa Tempatan seperti yang termaktub di bawah Seksyen 35 Akta Eksais 1976.
- iv. Larangan penyiaran iklan minuman keras di dalam siaran televisyen Kerajaan dan swasta melalui Garis Panduan Penapisan Filem 1996.
- v. Tindakan penguatkuasaan yang berterusan bagi membendung penjualan arak haram, sama ada arak yang diseludup mahupun arak tempatan yang dikilang secara haram. Antara tindakan penguatkuasaan yang telah diambil oleh JKDM termasuklah mengadakan Operasi Outlet dan Ops Pacak bagi menyekat *system delivery* penyeludupan dan penjualan minuman keras di outlet dan premis-premis yang menjual minuman keras tidak sah selain bekerjasama dengan agensi-agensis penguatkuasaan lain untuk menjalankan operasi-operasi penguatkuasaan bersepadu.

Sebanyak 3,352 kes yang melibatkan minuman keras telah diambil

tindakan bagi tahun 2013 sehingga 2015. Daripada jumlah tersebut, sebanyak 138 kes telah dibawa ke mahkamah.